



KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

12 Juillet 2019

09 Dhul-Qaddah 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

DAWAT-I-ALLAH (PARTIE 1)

Alhamdulillah, Summa Alhamdulillah, mo ti écrire ene livre depuis bien longtemps lors l'importance de **DAWAT-I-ALLAH** ki bien longue, et mo pé partage li avec zot en forme de Khutba Jummah parceki sa sujet là li bien bien important et plusieurs mo bane disciples aussi fine demande conseil avec sa humble serviteur là pou cause lors sa sujet là, pour ki zot aussi zot gagne la capacité pou faire le *Dawat-i-Allah*, et vine bane excellents *Dai-illallah*. Alors, sa sujet là pou diviser et pou faire en plusieurs fois dans mo bane Khutba Jummahs et mo faire *duahs* ki mo bane disciples en Inde, dans Delhi, Kerala, Tamil Nadu – Coimbatore, Trichy, Melapayalam, Kottar etc. et mo bane les autres disciples dans UAE, l'Afrique, bane l'île et dans bane plusieurs les autres pays profite de sa, ki sa bane Khutba Jummah là enrichi zot connaissances en matière de *Dawa/ tabligh* et ki zot vine bane excellents **DAI-ILLALLAH**. *Insha-Allah. Ameen.*

DAWAT-I-ALLAH: INVITATION VERS ALLAH – ENE OBLIGATION IMPORTANT.

Si nous envie vine bane compagnons de Hazrat Muhammad (saws), li obligatoire pour chaque dimoune ki li invite les autres vers Allah parceki celui ki cultiver, ki

faire zéffort [par exemple, prend l'habitude pou invite dimounes] dans le chemin d'Allah, c'est li-même ki pou parmi bane compagnons du Saint Prophète Muhammad (saws). Nous bizin entretenir nous plantation bien jusqu'à ki li prêt pou le récolte. Tous bane membres du Jamaat Ul Sahih Al Islam, National et International ki pé faire le travail d'invitation vers Allah, zot noms citer dans bane paroles d'Allah et si zot ouler ki Allah mentionne zot dans So bane paroles, et compte zot parmi bane compagnons de Hazrat Muhammad (saws), alors li nécessaire ki zot cultiver dans le chemin d'Allah. Ainsi, zot pou bizin crée bane nouveaux qualités spirituels dans zot.

DEUX POINTS DE DAWAT-I-ALLAH.

Premièrement le *Dawat-i-Allah* li pas ene contribution volontaire, ni li ene *Nawafil/ Nafil* ki si ou pas accompli li pas pou ena aucun différence dans ou spiritualité. Le *Dawat-i-Allah* li obligatoire et Allah fine donne ene l'ordre exceptionnel car Li fine dire avec le Saint Prophète (saws) ki : *Si to pas faire le Dawat-i-Allah, alors to l'apostolat fine gaspiller.* – L'*Oummah* du Saint Prophète (saws) pou bizin réponde pou sa et ainsi ki chaque individu. Personne pas pou sapper là-dans. Propagation de sa message noble là li ene qualité obligation ki personne pas capave, à aucun moment, reste ignorer de sa, et péna aucun excuse aussi pou pas faire li !

Deuxièmement, c'est ki bizin cherche sa travail noble là et roder ki ena pou faire et ki quantité ou pou capave faire. À chaque fois ki ene prophète d'Allah vine lors sa la terre là, fine ena toujours bane désordres et faire l'appel ki attention alle gagne contact avec le Messenger d'Allah. Alors pou empêche bane dimounes approche avec Allah So messenger, zot passe bane mots-d'ordre ki bizin boycotter, pas faire *Salaam*, pas invite li et bane ki fine croire dans li dans bane fonctions ; et même zot alle pli loin ki sa kot zot faire casse relation familiale. Et tous les temps la responsabilité de bane désordres et sème la haine dans le cœur de bane dimounes contre le messenger d'Allah vine de côté de bane malfaiteurs et l'ennemies de sa messenger d'Allah là et de message Allah ki li fine apporter ou fine vini pou faire revivre. Alors toujours nous bizin informe nous bane missionnaires de sa bane complots et désordres de sa bane malfaiteurs là, ki faire bien attention kan zot pé faire *Dawat-i-Allah*, ki sa bane malfaiteurs capave faire bane kitchose grave avec zot bane mauvais plans ki zot ena dans zot la tête et envoie sa blâme là lors nous bane missionnaires ki pé faire le *Dawat-i-Allah*.

Nous bane serviteurs du Chef de l'innocence [Hazrat Muhammad (saws)], alors nous bizin ena sa qualité innocence là dans nous. Nous pas bizin ena aucun imbécilité dans nous, nous pas bizin faire aucun bane erreurs ki sa pou ouvert le chemin et donne l'occasion sa bane malfaiteurs là pou dire toutes sortes qualités mauvais causer contre nous et kot sa bane là aussi profite sa l'occasion là pou faire la provocation et après zot va dire ki c'est nous ki fine rode la guerre avec zot, et zot cause menti, pou alle pli loin, kot zot dire nous fine batte zot.

C'est nous ki ena pou faire *Dawat-i-Allah*. Sa contrainte là lors nous sa et ensemble avec sa fine dire ene lotte grand parole dans Quran Shariff ki c'est zot ki bizin vine complète sa deux commandements là et sa vine obligatoirement lors zot et alors besoin ki tous bane membres du Jamaat Ul Sahih Al Islam faire le *Dawat-i-Allah*. Li besoin ene tel *Dawat-i-Allah* ki pareil couma nous bien-aimé prophète (saws) ti pé faire le *tabligh*, alors chaque nation ou chaque individu ki accompli sa deux commandement là, Allah (swt) pé dire : *Mo prend responsabilité sa parole là lors Moi ; Mo pé faire zot croire avec fermeté ki le monde pas pou capave dérange narien pou zot, c'est-à-dire ki adversaires, l'ennemies pou ena à travers le monde mais Mo pas pou donne zot sa capacité là pou faire zot (bane ki faire le Dawat-i-Allah) du tort.*

RÉSULTAT SI ZOT IGNORE LE DAWAT-I-ALLAH.

En vérité, si ou fine gagne le droit chemin et Allah (swt) fine ouvert ou lé cœur à So religion (l'islam) et fine faire ou reconnaître la Manifestation Divine et croire dans So messenger ki Li fine envoyer et ou gagne honté, ou peur pou invite les autres dimounes pou rentre dans Allah So religion, définitivement pas pou ena aucun l'avancement spirituel dans ou la vie et ou pou alle constater, combien de temps ou pé amène ene la vie remplie de difficultés, de problèmes, péna aucaine bénédiction divine, parceki ou pé gagne peur pou approche sa bane qualités pharaons là.

Donc chaque pharaon pou prend zot comme ene champion de la religion et zot pou domine ou et pou prend ou comme inférieur et l'heure là même ena bane '*so-called Chaudhry*' pou dire bane mauvais causer contre Allah So messenger, kot zot pou dire « *Hauteur cheville mo Amir [magouillière, malpropre là] li pas pou arriver.* » Après sa même qualité causer de sa '*so-called Chaudhry*' là, Allah (swt)

manifester Li pou montrer le vrai visage de so Amir magouillière là [le ex-Amir] maintenant alors, sa 'so-called Chaudhry' là prend billets (l'argent) alle couvert malpropreté ki 'so-called Amir' fine faire kot so 'so-called Amir' prend permission avec tiroir mettre l'argent de bane contribuable dans so poche.

Donc bane *Dawat-i-Allah* bizin pas peur zot ; Bizin lève are zot et c'est par l'intermédiaire de *Dawat-i-Allah*, ki pou capave amène ene grand révolution mondiale, et sa même le travail du Jamaat Ul Sahih Al Islam pou ramène sa révolution spiritual là à travers le monde kot bane fausses idoles (chefs spirituels) pou batte-pédale, c.à.d. pou sauver aller. Donc pou apporte sa révolution spirituel là à travers le monde, pas penser ki ou pou marche lors tapis velours et ou pou gagne ene accueil kot guirlande dans licou et l'accueil chaleureux. Non ! Ou pou ena boucou épreuves, boucou problèmes, mais Allah (swt) pou avec ou. *Insha-Allah*.

MANQUE D'ÉDUCATION PAS BESOIN VINE ENE OBSTRUCTION POU DAWAT-I-ALLAH.

Chaque membre du Jamaat Ul Sahih Al Islam, ki li ene homme, ene madame ou ene zenfant besoin travail dans so l'environnement et so manque d'éducation pas pou vine ene obstruction dans so chemin parceki maintenant ena plusieurs qualités méthodes comme par exemple, ena Web-site, CD Audio, CD Video, Smartphones, Littératures, Khutba Jummah en plusieurs langues, Blog du Jamaat etc. ki capave aide bane dimounes ki pas conne bane arguments ki bizin donner dans le cercle de *Dawat-i-Allah*, et alors zot aussi capave faire bon *Dawat-i-Allah*. Couma mo ti dire zot, dans tous kitchoses, fauder pas ou dépasse ou limite. Pareil couma pou télévision, ou internet ou smartphones, faudé ou conne servi sa bane z'outils là pou faire le *Dawat-i-Allah*, et pas servi sa pou faire mauvais travail ou bane z'affaire pou gatte l'image de l'Islam, et du Jamaat d'Allah dans sa siècle là. Tout pou faire selon ou l'intention et actions ki ou faire pou obéir bane commandements d'Allah et de so Messenger, Hazrat Muhammad (saws) et bane l'instructions du Khalifatullah de sa siècle là.

ENA DIRE KI DANS PAYS ISLAMIQUE PAS CAPAVE FAIRE DAWAT-I-ALLAH.

Celui ki dans bane pays islamique intentionnellement arrête faire le *Dawat-i-Allah* ou bien ki li penser ki le *Dawat-i-Allah* fine arrêter parceki ena grands dominations,

alors, sa li ene fausse pensée sa. Celui ki pas pou faire le *Dawat-i-Allah*, lors li aussi pou gagne sa domination là parceki déjà bane adversaires penser ki nous dans fausseté, et sans même faire le *Dawat-i-Allah* nous vine prisonniers mais, sa qualité domination là péna aucun profit là-dans, li sans aucun récompense. Alors si ou ena pou aller même, ki faire ou pas faire *Dawat-i-Allah* avant ki ou vine prisonnier, comme sa ou pou capave bénéficier l'amour d'Allah.

OBLIGATIONS DE DAWAT-I-ALLAH ET BANE RESPONSABILITÉS DU JAMAAT.

Pour fleurir et cultive bane champs et jardins d'Allah, c'est travail de bane responsables sa. Sa pas faire seulement par donne conseils, ni par réveil mémoire mais plutôt besoin participe ensemble et montrer travail. Ene partie garde sa principe là en vue, ki bizin consolide et attrape ene partie dimounes avec zot et garde ene très bon relation de gentillesse avec zot et crée ene l'amour pour sa travail là dans zot le cœur, sa c'est ene Art sa. Et concernant sa art là, Quran fine présente ene jolie l'éclairage, la lumière lors là parceki nous besoin profite de sa afin ki nous réussi dans sa travail là.

MARTYRS BIZIN EXPECTE KAN FAIRE DAWAT-I-ALLAH.

Le sujet martyrs faudé pas ene frayeur pou bane *Dai-illallah*, bane ki faire le *Dawat-i-Allah*. Donc, kan ou rentre dans sa Jamaat Ul Sahih Al Islam là, péna aucun excuse pou ene membre de sa Jamaat d'Allah là pou pas faire le *Dawat-i-Allah*. Dans n'importe ki coin du monde ou été, ou bizin passe le message divine, ou besoin faire *Dawat-i-Allah* et *Insha-Allah* le nombre de bane *Dai-i-illallah* pou multiplier ; avec ene ou pou gagne dix-mille *Insha-Allah* ki pas pou peur. Faudré pas même ena frayeur et gagne peur de bane dangers, '*ki attention bane malfaiteurs là faire moi ditort ou touye moi*'. Faudé pas zot ena sa qualité frayeur là. Zot besoin bane tels dimounes ki mette zot confiance dans Allah seul et dans la vérité ki zot fine recevoir de Li [Allah] dans sa siècle là. Donc mette sa bien dans la tête ki le martyr déjà trouve dans destin de bane *Dai-i-illallah*.

BESOIN PROTÈGE L'HÉRITAGE PUR.

« *Ou besoin alle de l'avant avec contentement et certitude* ». Sa c'est parole de *Dawat-i-Allah* ki mo chef [Hazrat Muhammad (saws)] fine mette dans mo le cœur et par la grâce d'Allah, azordi beaucoup de bane membres du Jamaat Ul Sahih Al

Islam pé ena sa grand l'envie là pou faire le *Dawat-i-Allah* et mo dire zot ki pas laisse sa l'envie là éteindre [teigne] et si zot protège sa grand l'envie pur ki zot fine hériter là et zot reste sincères lors là, alors mo faire serment lors Allah ki zot pou reste bane suivants éclairer et jamais sa la lumière lors zot là pou éteindre. So niveau pou hausser aller même et li pou éparpiller partout d'ene personne/ dimoune à l'autre et li pou envahir la terre entier et li change tout bane noirté en clarté. *Insha-Allah*.

Pas délaisse sa faveur là, Ô mo bane disciples. Zot fine reconnaite bane signes d'Allah dans sa siècle là, et Allah aussi fine donne zot la capacité pou faire le *Dawat-i-Allah*. Pas tombe dans panneau de bane ki ena la haine pour la vérité ki vine d'Allah, kot ou accepter gagne kitchose mondaine – zot attire ou avec sa, et tente ou pou délaisse sa vérité ki ou fine reconnaite là. Alors, penser bien, Ô bane membres du Jamaat Ul Sahih Al Islam, ki ici nous pas ene Jamaat ki mette dimoune dehors, mais penser bien ki c'est Allah ki pou retire ou de sa Jamaat là si Shaytane attrape ou lé cœur et faire ou gagne doute lors bane vérités ki ou fine témoigner. Alors, penser bien ki pou ene certaine moment, ou pou penser ki ou dans correcte, ki ou ena la masse de bane dimoune avec ou, ki pé encourage ou et félicite ou ki ou fine quitte la vérité, ou fine quitte la Manifestation Divine, mais penser bien après, ou pou tombe tousel, et saki pli grave là-dans, Allah pou abandonne ou et ou pas pou ena aucun ressources.

Dans le Jamaat d'Allah, dans l'**ISLAM** ki Allah fine faire revivre dans sa siècle présent là, il est vrai ki ou pou passe par toutes sortes qualités épreuves, à ene tel point ki ou pou capave désespérer. Mais, ou, faudré pas ou décourager. Penser, bane compagnons de Hazrat Muhammad (saws) et nous Aka (saws) li-même fine passe par sa chemin de bane épreuves là. Alors, ki nous été alors, pou pas passe par sa bane difficultés, persécutions et martyrs là ? Alors, pas vende zot l'âme pou gagne satisfaction mondaine ou bane les autres kitchoses [couma mariage etc.]. Allah pas content ki après ki ou fine reconnaite et accepter la vérité, et ensuite ou tourne ou les dos. Sa li grave dans le chemin d'Allah. **BIEN GRAVE MÊME.**

Pas vine sa bane qualités dimoune là. Pas vende zot *Imaan* (la foi) lors Allah et So *Deen-i-Islam* pou ene petit profit mondaine. Pas vine bane ki renonce à zot religion, ou bane ki renonce bane Messagers d'Allah. Ena beaucoup avec sa la vie immorale et barbare ki pé faire ravage azordi jour, pareil couma dans l'époque barbare avant l'avènement de l'Islam, zot faire tėti, et refuse pou reconnaite Allah

comme l'Unique Dieu. Beaucoup pé vine bane Athées, et beaucoup aussi pé quitte la véracité de Hazrat Muhammad (saws), de Hazrat Massih Ma'oud (as) et ena même avec la poussée de bane les autres, zot laisse doute gagne le dessus lors zot et zot népli conner ki zot pou faire ? Reste dans la Manifestation Divine ou quitte la Manifestation Divine ? Zot dans balance, zot népli conner, tandique ki Allah fine rende tout clair pou zot. Sa li bien grave dans lizié d'Allah.

Nous société présent fine pourri, et alors, ou ki ena ene *Imaan* solide lors Allah, lors l'Islam et Hazrat Muhammad (saws), et lors véracité de Hazrat Mirza Ghulam Ahmad (as) et de sa humble serviteur et Khalifatullah là, alors, zot bizin prêts pou conne deal avec bane dimounes et invite zot vers l'Islam. Bane ki prend chemin travers après ki zot fine gagne le droit chemin, ou pas pou responsables de zot. Allah conne bien ki ou, ou fine bien passe le message, mais si demain zot quitte Allah, zot quitte l'Islam et même la foi dans l'existence de Dieu, alors si ou, ou fine fer tout zéffort, mais sa bane dimounes là pas response [zot pas faire zéffort zot aussi], zot reste aveugle, alors ou pas pou responsable de sa.

Mais ena aussi certains cas, Ô mo bane disciples, ki Allah servi sa couma ene exemple pou l'humanité, pareil couma Li ti faire Pharaon à l'époque de Hazrat Moosa (as) vine ene l'exemple pou l'humanité. Couma zot conner, Allah fine promette nous ki Li pou humilier tous bane ki fine humilier nous, Li pou deboute pou nous, et amène nous bane l'ennemies, bane ki ena la haine pou nous, vers zot destruction. Et Allah fine même dire, ki sa moment là pou vini sa, et alors kan li pou vini, alors nous-mêmes nous pou gagne pitié pou sa bane dimounes là. Nous pas là pou critique personne, couma dire nous content pou mange la chair de bane dimounes couma nous-mêmes, mais comme ene Messenger d'Allah, mo bizin faire mo travail afin ki sa servi comme l'exemple pou bane les autres, et ki zot pas répète même erreur. Pareil couma Allah fine dire, « *Mo pou amène zot vers zot destruction, petit à petit, sans ki zot réaliser, à travers zot zenfants, dibiens, etc.* »

Ti ena ene Mullah ki ti ena la haine pou nous, ki ti mange nous la chair beaucoup lors *Mimbar* de Hazrat Muhammad (saws). Li ti dire, même si nous rappe nous néné lors natte, Allah zamais pas pou pardonne nous, et kan trouve nous, batte carter, et malgré commié *Roza* nous pou garder, nous pou dépéri. Et li fine alle même dire sa parole là : « **Si ou zenfant fréquente Madras, ki li pou apprane ? Lève Cavadee !** ». Sa même Mullah là so zenfant azordi fine vine Athée. Li bien

malheureux saki pé passé. Mo dire sa, pas avec contentement du cœur, mais pou sa servi nous comme ene l'exemple, pou ki zamais nous alle dire bane kitchoses ki pou faire Allah en colère avec nous. Surtout ki ou alle dire bane kitchoses dans bane moments ignorance, kot ou kimé contre Allah et So Messenger.

Alors, zot, mo bane disciples du Jamaat Ul Sahih Al Islam, faudé zamais zot dire bane paroles ki pou capave mette Allah en colère. Ou pas conne ene kitchose de vérité ? Alors vaut mieux ou reste tranquille. Ou pas dire narien, attention ou la langue alle faire ou mayé dans piège de l'enfer. C'est ou-même ki pou souffert, ki pou dans *taqleef* (la peine).

INVITE DIMOUNE VERS ALLAH, LI OBLIGATOIRE LORS CHAQUE INDIVIDU.

Allah fine donne ou en héritage ene religion pur ki appelle **ISLAM**, et Li fine faire obligatoire pou ou pou faire les autres aussi vine vers l'Islam. Alors sa, li ene devoir bien noble ki zot, ki nous tous fine recevoir de la part d'Allah, et nous bizin conne faire nous travail bien. En tant ki ene Messenger d'Allah, mo là pou donne zot bane bons conseils, pou amène zot vers le droit chemin.

À travers le *Dawat-i-Allah*, zot pou capave éloigne zot bane problèmes misères. Sa li pas comme ene contribution volontaire ki si pas donner pas faire narien sa, mais plutôt li ene obligation ki nécessaire ki nous accompli. Nous pas capave dire ki nous ena l'intention là mais nous pas participer ni mette li en pratique pou invite dimounes vers Allah. Li obligatoire lors chaque individu pou faire le *Dawat-i-Allah*. So fruit pou extrêmement doux et so récompense pou bien grand devant ou Créateur, *Insha-Allah*.

PAS DIRE KI INVITE DIMOUNE VERS ALLAH, C'EST PAS NOUS TRAVAIL SA, OU POU COUPABLE DEVANT ALLAH.

Li toujours mo désir la nuit et li jour, ena ene la flamme ki allumer dans mo le cœur, ki faudré pas ene membre du Jamaat Ul Sahih Al Islam dire ki '*invite dimounes vers Allah c'est pas mo travail*'. Sa qualité parole là faudré pas li prononcer même sa et ni zot oublier faire le *Dawat-i-Allah*. À cause sa même Allah (swt) faire moi rappelle et moi à mo tour mo faire zot rappelle, mais si par l'ignorance zot oublier sa parole là, pense bien ki zot ena pou réponde devant Allah (swt). À cause sa même faudré pas zot néglige sa travail noble là et ni zot

laisse zot bane les autres frères néglige zot responsabilités. Azordi jour, plus grand responsabilité essentiel, c'est transmette message d'Allah à bane les autres dimounes de bane les zot religions.

LORS SUJET DE BANE GUIDES DU QURAN POUR DAWAT-I-ALLAH.

La façon ki Allah (swt) fine montrer Hazrat Ibrahim (as) pou faire *Dawat-i-Allah* et couma Li fine forme li pou faire sa travail noble là li extraordinaire. Donc, chaque missionnaire, chaque *Dai-i-Allah*, chaque Amir, chaque Sadr, chaque responsable concerné, ki li secrétaire *Islah-o-Irshad* dans Jamaat Ul Sahih Al Islam ou n'importe dans ki façon ki ou concerner avec sa travail là, li besoin attrape ene partie dimounes du Jamaat et li besoin adapter zot (c.à.d. sa partie dimounes dans Jamaat là) d'après le Quran Shariff. Besoin établir bane relations d'amitié avec zot, faire zot formation, donne zot un peu de travail et puis laisse zot alle partout.

Faire ene travail ki pou donne ene nouveau la vie. Azordi ou attrape 4, 8 ou 10 jeunes faire zot formation, mette zot pou travail et puis le lendemain reprend 8, 10, ou 15 autres jeunes et quantité ki Allah pou ouler, ou augmenter aller même... Coumsa même ou nombre besoin augmenter tout le temps plus ki avant et tout le temps besoin mette sa parole là bien en tête ki si pas le nombre pé augmenter ou non. Est-ce-ki mo pé conner lors quantité ki ena avant ou sois mo pé faire zéfforts pou augmente quantité plus ki avant ?

[Mais pas faire couma Jamaat Ahmadiyya ki zis pou plaire zot Khalifa, zot dire fine gagne *Bai'at* par million et sa annoncer officiellement au niveau international, kot en vrai dire nek pé gagne bane chefs de villages et faire li et tous so bane suivants signe forme *Bai'at*, et ainsi ki ene dimoune et tous so bane camarades, zis pou passe couma ene grand *Dai-Khalifa* (amène dimounes vers Khalifa) devant lizié dimounes. Dans Jamaat Ul Sahih Al Islam, mo pas ouler ki mo bane suivants faire dimounes conne zis le Khalifatullah. Nous travail c'est **AMÈNE DIMOUNES VERS ALLAH**. Ou bizin établir bane dimounes fermement lors **ALLAH** avant tout, et aussi lors **MUHAMMAD RASSOOLLULLAH**. Et bien après kan bane là fine bien comprend l'islam ki ou faire zot comprend la Manifestation Divine, couma Allah encore pé causer et fine élève bane réformateurs couma Hazrat Massih Maoud (as) et sa humble serviteur là comme le Khalifatullah. Faudé pas zot vine sa bane qualité dimounes, ki faire signes zis *Bai'at* sans ki bane dimounes conne vrai

valeur de l'islam, zis pou faire le Khalifatullah plaisir. Non, **Dawat-i-Allah**, li seulement pour faire **ALLAH** plaisir !

Li bien malheureux ki ena *Bai'at* confetti dans Jamaat Ahmadiyya, et kan ene dimoune ti attire l'attention du regretté 4^{ème} Khalifa lors là, ki li faire ? Li humilier sa dimoune là dans ene Khutba Jummah et envoie *Lannat* lor li, seulement parceki sa dimoune là fine demander si pas li ene kitchose ki genuine sa ki pé gagne *Bai'at* par millions, si pas sa bane dimoune là conne vraiment l'islam etc. ? – Alors, mo pas ouler ki mo bane disciples/ suivants vine coumsa, ki zis pou faire Khalifa/ Khalifatullah plaisir, zot faire signe forme *Bai'at* sans ki sa bane dimoune là fine établir zot fermement lors l'islam.]

Et en plisse de sa ou besoin guette la qualité aussi. Pas zis quantité ki important, mais la qualité aussi ; couma ou pé faire ou *Dawa* avec sa bane dimoune là, couma pou pé entraîne nous bane jeunes pou faire sa travail noble là ?

CHAQUE MOIS BESOIN PRÉSENTE LE TRAVAIL DE DAWAT-I-ALLAH DANS LE MAJLIS-I-AMILA.

À chaque fois mo fine attire l'attention du Jamaat ki chaque mois besoin considère sa sujet (*tabligh*) là dans zot *Majlis-i-Amila*, combien frères et sœurs pé intéresser dans le *Dawat-i-Allah* et celui ki pé intéresser, est-ce-ki li conne principe faire *Dawat-i-Allah* ou non et bane ki pas pé intéresser, ki pé faire pou faire zot intéresser ? Moi, tous les temps mo fine ena sa dans mo la tête ki le Jamaat Ul Sahih Al Islam besoin ena nous **DAWA ACADEMY** et d'ailleurs c'est à travers l'instruction divine même au commencement de la Manifestation Divine, ki Allah fini établir ki nous pou besoin ena nous propre **Dawa Academy**. *Insha-Allah*.

POUR DAWAT-I-ALLAH NÉCESSAIRE, KOT LI ENA TOUS SO L'IMPORTANCE, ENA BANE CONSIELS CONTINUEL.

Dans bane champs ki donne des peines [fer zéffort], ena résultat. C'est à cause sa même à chaque fois besoin faire appel et li nécessaire pou donne des peines à chaque fois. Bane Amirs besoin rappelle sa bane paroles là bien ainsi ki zot *Majlis-i-Amila*. Bane Secrétaires *Tabligh/Dawa* (*Dawat-i-Allah*) aussi besoin rappelle bien sa bane paroles là. Donne conseil ene ou deux fois seulement pas suffit. Mo

encourage bane *Majlis-i-Amila* pou prend la responsabilité ki chaque mois, zot besoin discute lors sa sujet là, et pas besoin ena aucun *Majlis-i-Amila* si au moins ene fois par mois [dépende pays ki zot été – et commié fois zot capave zoine], péna sa sujet là lors Agenda. Nous besoin surveille le *Dawat-i-Allah*, nous besoin guette ki démarches nous pé faire et ki bane résultats fine gagner de sa bane démarches là. Combien bane nouveaux membres du Jamaat Ul Sahih Al Islam ki nous fine faire zot vine *Dai-Ilallah* et donne zot ene nouveau statut dans le domaine spirituel.

Insha-Allah, ki Allah faire nous réussi dans sa travail noble là, et *Insha-Allah*, mo pou contigne lors sa même sujet là Vendredi prochain. *Ameen*.

Mo félicite tous mo bane disciples ki fine prend à cœur sa travail noble là, et zot sacrifier zot les temps et zot moyens pou alle faire le *Dawa* et aussi pou alle zoine nous bane les autres membres dans bane les autres l'états et pays afin pou maintenir l'unité de l'Islam, Sahih al Islam. *Masha-Allah*. Ki Allah faire zot *Mubarak* kot sa sa zot été ; kot zot pou aller, Allah pou avec zot et aide zot et béni zot pou zot bonne intention et zot l'amour pou servi zot les temps dans le chemin d'Allah. *Alhamdulillah*.